

Date – 04/08/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Agnipath Scheme hnuaiia Mizo thalai sipaia tling tharte chu Assam Rifles buatsaihin chawimawi an ni.
2. International Mizoram Trade Expo vawi 1-na Champhaiah nimin khan hawn a ni.
3. Ram dodalna kawnga inhnamhnawih thin sorkar hnathawk mi 6 Jammu & Kashmir sorkarin a ban.
4. Paris Olympics 2024-ah China chuan Gold Medal la tam berin hma a hrui mek a, India-in Bronze Medal 3 la tawhin 54-na a ni mek.

<><><>

AGNIPATH

Thalaite India sipaia an luh theih nana sorkar laipuiin a duan, Agnipath Scheme hnuaiia Mizo thalai sipaia tling tharte chu Assam Rifles buatsaihin chawimawi an ni.

Assam Rifles Aizawl Battalion te chuan Mizo thalai sipai tang duhte tan an inzirlawkna hun, physical leh written exam Pre-Recruitment Training chu kumin February ni 25 atanga May ni 5 chung khan a buatsaih a, Physical training-ah hian zirlai 86 telin mi 13 te chu Agnipath scheme hnuaiia sipai, Agniveer ni thei turin an tling a ni.

Sipai tling tharte lawmpuina hunah hian Lt. Col. Nikhil Prakash, 2nd in Command chuan Agniveer te chu ram tana theihtawp chhuaha invawng tlat turin a chah a. Assam Rifles chu zirlai hma hun êng tak nei, sum leh paia harsa leh kaihhruai ngaite tan englai pawhin training pe turin an inhawng reng, a ti a. Sipai mai piah lamah exam hrang hrang hmachhawn tur tan a thlawn vekin zirtirna an pe thei a, zirlai a duh apiang tan Pre-Training turin an pan theih tih a sawi bawk a. Zirlai, hlawhtlinna chang te chuan Assam Rifles ten an puihna zawng zawngah lawmthu an sawi ve bawk a ni.

(CORR)

<><><>

CHAMPHAI TRADE EXPO

International Mizoram Trade Expo vawi 1-na chu Champhai Kahrawt vengah Vanlallawma Indoor Stadium (VANIS)-ah nimin khan Champhai District Addl. D.C., Pu K. Zorammuana'n a hawng.

Pu K. Zorammuana chuan Trade Expo chu sumdawna kawnga ngaihtuahna thar siamtu, Mizo sumdawngte leh hnamdangte inkara inlaichinna tha siamtu ni se a duh thu a sawi a. Mizoram awmna chu hmun pawimawh tak, Myanmar leh Bangladesh ramri ten an hual vel a nih avangin Kaladan Multi-Modal Transport Transit Project (KMMTP) a puitlin hunah pheih chuan khawmual leh tuipui kaltlangin Asia chhim chhak ram te leh Bangladesh tan India ram kawtchhuah a la ni thuai dawn a, he hun atan hian tun atanga inpuahchahna kalpui a ngai a ni, a ti.

1st International Mizoram Trade Expo hi August ni 5 atanga August 24 thlengin Vanlallawma Indoor Stadium (VANIS) Ground Floor-ah neih a ni dawn a. Expo-ah hian ramchhung leh pawn atangin sumdawng engemaw zat an kal khawm a, ni tin zing dar 10 atanga zan dar 8 thleng mipuite tlawh theiha hawn thin a ni ang.

(Lahlupuaia Champhai PTC)



WOMEN & CHILD DEVELOPMENT

Women & Child Development hmalaknain Thenzawl Common Poshan Vatika-ah 'Ek Ped Maa Ke Naam' and Plant4Mother' hun hman a ni a, thingphun runpui neih a ni.

Women & Child Development Director Pi Zoramthangi Chhangte chuan thing chu boruak tha petu mai bakah khaw lum chho zel venna atana pawimawh ber a nih thu a sawi a. Thing leh mau te chu leilung luang ral tur vengtu, khuarel chhiatna tam tak laka vengtu, mihringte dam khawchhuah theihna tura pawimawh tak a nih thu sawiin thingphun uar zel tur leh thingphun pawimawhna te hre thar turin kalkhawmte a chah a ni.

Thingphun hnatlangah hian Serchhip District Programme Office leh Serchhip ICDS Project, Thenzawl Forest Division-a thawktute bakah Thenzawl khuaa Anganwadi Worker leh Helper te an tel a, thing tiak 60 chuang an phun a ni.

'Ek Ped Maa Ke Naam and Plant4Mother' hnuaiia thing phun runpui hi July ni 22 khan Women and Child Development Minister Pi Lalrinpui'n Sakawrhmutuaitlang-ah a lo hawng tawh a. Environment Forest & Climate Change Department te nen thawk hoin thing tiak 50 chuang an lo phun tawh a ni.

(Corr)



MAMIT

Mamit atanga Aizawl panna kawngpui National Highway 108 (NH 44A tih baw) chu Dampui leh Dapchhuah inkarah Zirtawpni tlai khan lirthei eng chi mah kaltlang theih lohvin leiminin a hnawh a, nimin chhun khan lirthei te chi kaltlang theih tura tih-tlang a ni.

Leimin vangin National Highway 108 a ping a ni tih hriat a nih veleh kawng enkawltu PWD Highway Division 1 te chuan an SDO Pu Lalrohlua hovin thenfai hna ngawrh takin an thawk nghal a, leiminna lai hmun hi leitan a nih avangin duh

angin hna a thawh chak theih lohva, ni,in chhun khan lirthei te chi (LMV) kaltlang theih tura siam a ni a, ruah a sur lohva lei a min belh loh chuan lirthei eng chi pawh kaltlang theih tur a thenfai vat an inbeisei a ni.

Hetih lai hian ruah a sur nasat chuan kawng chung hi min hlauhawm a la ni tih kan corr chuan a sawi.

(RD Darthanzauva Mamit PTC)

<><><>

BCM

Lungleia Lunglawn Baptist Church of Mizoram chuan zing tawngtai inkhawm an neih kum 60 tlinna pualin nimin khan hun an hmang. Anni kohhran hi Mizorama zing tawngtai inkhawm nei hmasa ber niin an insawi.

Nimin zing khan Kohhran Chairman Elect Upa Ngurmuana kaihhruaiin Biak in tualah hun hman niin he hunah hian bialtu Pastor Rev. Sangliankhuma Chinzah chuan Jubilee puala monument siam a hawng a; Kohhran committee member te leh fellowship tina office bearer ten Jubilee dar an vua a ni. Hun hnihna Upa R. Kaptluanga, Kohhran Chairman kaihhruaiin Biak in chhungah lawmthu sawina inkhawm buatsaih a ni bawk.

Kohhran Secretary Upa K. Lalchamliaana tarlan danin, kum 1964-a World Vision in All India Pastor Conference, Guwahati-a a buatsaihah Lunglawn Kohhran atangin mi 3 - Upa Sâpkûnga, Tv. Vânlalliana (martar) leh Tv. Rokhama te an tel ve a. He hunah hian South Korea atanga rawn kal Dr. Samuel Moffat-a chuan S. Korea Kohhran a harha a nuna Missionary thahnem tâwk tak an tirh chhuah theih chhan ber nia a sawi, tûk tina khawpui dâia thawnghaina tlânga mi tam tak zing dar 4:30-a an thawnghai mup mupna rah a nih thu a sawi chuan Tv. Vânlalliana (Martar) thinlung a khawih nasa hle a. Mizorama la tih ve ngei chu a rilruah a riak lian ta hle a. Bul tanpui turin Tv. Ch .Siamthanga, Tv. R. Thangruala te leh a remchang thei apiangte a sâwm a, August ni 3,1964-ah zing tawngtai inkhawm chu tan a ni a; hemi tuk hian Tv.Vanlalliana hi zing dar 4:30-ah laltin khaiin Biak in chhungah a thu a, kum 1972 atangin Kohhranin hma a la chho ta a ni.

BCM Lunglawn Kohhranah hian Covid-19 hri len lai tih loah chuan kum 1964 atangin zantin inkhawm an nei ziah thin a ni.

(Thanghmingliana Lunglei PTC)

<><><>

MBCC

Mizoram Business Coordination Committee (MBCC) chuan tun hnai hian Mizoram chhungah dan loa sumdawng an tam tih an sawi.

MBCC thuchhuah tarlan dan chuan, Mizo hming hawha hnam dang dawr leh Mizo hminga hnam dang lirthei register awm zawng zawngte chu dan anga hrem an nih theih nan hmalak an tum a; dawr siam nan leh lirthei register nana hming hman tir zawng zawngte chu a rang thei ang bera an hming an hmantir te titawp nghal turin an ngen a. Hetianga Mizo hming hmanga hnam dang dawr leh lirthei register titawp lote chhungah hmalakna a awm a nih pawhin mahni hnam hralha mahni hming hnam dang hmantirtute mawh a ni ang tih hre turin an ngen bawk a ni.

MBCC chuan Mizorama sumdawng engemawzatin Income Tax atangin Income Tax pe tura tihna lehkha leh lehkha dang an dawng tih pawh sawiin hemi chung changah hian Income Tax lama thawkte leh Dan hre mite nen zirchianna zau

zawk buatsaih tura hma an lak mek thu sawiin tumah lo chi-ai lo tur leh hetiang lama harsatna nei te chuan MBCC hruaitute hrilh nghal vat thin turin an ngen a ni.

<><><>

OLYMPICS GAMES

Paris Olympics 2024-ah China chuan Gold Medal la tam berin hma a hruai mek.

China hian Gold Medal 16, Silver Medal 12 leh Bronze Medal 9, a vaiin medal 37 a la tawh a. United States-in Gold Medal 14, Silver Medal 24 leh Bronze Medal 23, a vaia Medal 61 la tawhin 2-na an ni mek a. France-in Gold Medal 12, Silver Medal 14 leh Bronze Medal 15, a vaiin Medal 41 an la tawh a, pathumna an ni mek a. India chuan Bronze Medal 3 la tawhin 54-na a ni mek.

(News On Air)

<><><>

GOVT. EMPLOYEES FIRED

Jammu and Kashmir Union Territory sawrkar chuan department hrang hranga thawk mi paruk a ban. Sorkar thuchhuah tarlan dan chuan an ban tak hnathawk panga te chu Police Department-a Constable an ni a, hnathawk pakhat chu Education Department-a zirtirtu a ni. Heng hnathawkte hi ram dodalna thila thuk taka an inhnamhnawih avangin India Danpui Article 311 angin Government Service atangin ban an ni.

Official-te chuan heng hnathawk parukte thiltih hi dan kengkawhtu leh intelligence agency-te chuan firfiak kaihnawih thila an inrawlhna a ni, an ti a. State thatna tichhe thei thilah an inrawlh nasa hle tih an hmuh vang a ni, an ti bawk.

Sawrkar hna an thawk chung a sorkar do zawnga chete'n an chhawr tangkai thin te lakah UT Sorkar chuan Zero tolerance policy a siam thu an sawi a ni.

(News On Air)

<><><>